

A'ij tì tira'uyú'uxaca'a a'íjna í San Judás

Judás pu tihuá'ayu'use'e a'ímej í tì Dios hua'utajé

¹ Inee, i nej i'lí Judás, nee nu seij pírici tì tí'ivaire'e a'íjna jemi í Jesús tì ajta Cirístu'u pú'een. Nee nu neajta juutzeájra'an pú'een a'íjna í Jacobo. Ayee nu tejá'amuayu'use'e mú'een mi tì amuaatajé í Dios, a'íjna í tej teajta rájya'upua. A'íí pu ajta á'amuacha'íí a'ame tì ij ayén tejamuáaci'iti sej siyen seíre'e xá'aju'un jemin í Cirístu'u. ² Ché'e ayén tejamuáaci'iti tì Dios, ayén amuá'ancu'uvajxi'in temua'a naa, tì 'ij ajta nain jín amua'anpuá'ajte'en sej si siyen huápi'i huaújxe'eve'en seij seajta seij.

*Jíme'en a'ímej í mej hua'itzi jín tihuá'itíii
(2 Pedro 2:1-17)*

³ Ayee pu'u, ne'l'huaamua'a mi nej já'amuaxe'eve'e, ayée nu tí'ijxe'eve'eca'a nej niyen ne'íjna jín tejámuaata'ítí'lí ne'íjna jíme'e tì Dios tu'irátuaasin tetíj tena'a pua'amé tej tiyen rá'astijre'e. Mi ajta, ca'aníjra'a pu naatá'aca nej ni niyen ca'anéeri jín tejámuaatayú'use'en nej ni niyen tejámuaatáhuavii sej siyen tiu'utatése'en sej si seuj ra'ará'astijre'en se'íjna í niuucari tì seij na'a raateájtuaa huá'a jemi í tì Dios huateúra'ate.

⁴ Seica mú avíitzi jín ajteújnaxcaca'a mú'ejmi jemi. A'íí mú a'íin pú'een í mej caí rá'astijre'e í Dios. Majta seicié pu ayén tihuá'amitieje'e a'íjna

í niuucari í tej jín ráamua'areeri'i ti huáapua'a pu rf'i titaatá'a a'íjna ti tí'ita'aijte'e, a'íjna í tavástara'a, í Jesús ti ajta Ciríistu'u pú'een. Ayee pu ti-huá'amitiejte'e ti nu'u a'íin tavástara'a ayén rf'i tihuá'utá'a mej mi miyen ché'e mana'a a'ij pua'a titeetiújcha'íica a'ij ti tihuá'amitiejte'e. Ayee mú me'íjna jín huarín, a'íi mú majta mé rúujipua í tavástara'a. Ajta ayén tihuá'aci'iti a'ij ti ajmí'i té'eyu'usi'ihuaca'a í mej jín rajpuáitz muá'aju'un.

Jíme'en í ti Dios ajmí'i hua'uxíjte

⁵ Ayee nu raxf'eve'e nej niyen amuaatá'an sej ra'utámu'a'ree ti a'íin tavástara'a xaa hua'irájtuaa a'ujna u Egipto a'ímej í ruteítstemua'a. Aj pu'i á'iyen a'íin ayén hua'upuá'ajte a'ímej í mej caí ra'ará'astijre.

⁶ Majta a'íime í mej ta japua tí'ivaire'e, í mej majta caí araúraste me'íjna jíme'e í ti jín Dios hua'antihuau, sino maraatéxíeehuataca'a me'íjna jíme'e í mej jín titeté'u'upu'uca'a u ta japua a'u mej a'uté'eca'a mej mi pua'amecié ti'iti jín te'enteárute ti jaítze'e jín seijre'e. A'íj pu jín, Dios ayén hua'iteáana a'u ti a'utíca'a. A'uu mú aiteánami'ihua muá'aju'un tij na'a ti yú auca'ití a'ame tij na'a rusén jíme'e, ti i a'íin Dios ayén puaíztzi hua'utá'an a'íjna xicáara'an tí'ij huá'axijte'en naíjmi'ica matíj mana'a pua'amé seijre'e.

⁷ Ayee pu che'atá na'a Dios hua'uxíjte a'ímej í mej Sodoma é'echejca'a, majta í seica í mej Gomorra é'eme'ecantaca'a, majta seica í mej a'ímuá antachéejme'ecaa. Ayee mú huataúra'a a'íime mej mi huaújxana'acira'aten, mej mi majta seicié ti'ihuaújxana'acira'aten a'ij ti caí tiraavíjte'e,

teáata'a jamuan í ruxí'ej teáata'a. Ayee mú tiu'utaseíjriti'ihuaca'a mej me'ín pú'een í mej miyen tirajpuajtzi muá'aju'un me'íjna jetze í taij tí caí ja'anáj á'amí'ini.

8 Majta a'íime í mej avíitzi jín ajteújnaxcaca'a mú'ejmi jemi, ayée mú che'atá mana'a me'íjna jetze tí'imua'atze yee mej ruxiéehua ruxána'acira'aten. A'íj mú jín a'ij pua'a raruure í rutevij. Majta miyen mé rúujipua ja'ati tí na'a tí til'iti jín antiújmua'aree. A'íí mú majta a'ij pua'a tihuá'axa a'ímej í mej ta japua é'eseijre'e, í mej majta rí'i huápi'i naa seijre'e.

9 Mí ajta a'íin Miguel tí jeíhua ti'iti jín tí'ivaire'e í ta japua, capu ayén huataúra'a tí ayén ca'anín jín ra'uxíjte'en a'íjna í tiyaaru'u matí'íj tí'itese'eca'a me'íjna jíme'e a'ij mej ráaruuren í tévira'an a'íjna í Moisés teecan. Capu xaa ayén ca'anín jín ra'uxíjte sino ayée pu tiraata'ixaa tijín: "Ché'e a'íin tavástara'a mua'ajteá'axí'in."

10 Mí majta a'íime í teteaca, ayée mú ché'e mana'a a'ij pua'a tí'ixaxa'a me'íjna jíme'e tí'iti tí a'ij mej caí yaú'iti. Ajta ayée mú me'íjna jín rujíimua'a aújpua'ajte'en me'íjna jíme'e í mej rujíimua'a a'ij tirajteuve, ajta a'íjna tí a'ij pua'a tihuá'amitieje'e. Ayee mú 'een matíj í tí'iti mej caí raayí'iti mej tíu'umua'ati. A'íj mú jín rujíimua'a aújpua'ajte'en.

11 Cui'i xaa, Dios pu puaíjtzi hua'utá'asin a'ímej. Ayee mú che'atá mana'a a'ij pua'a titetiújcha'íí tíj ajta a'íjna í Caín. Huáapua'a mú miyen huataúra'a mej mi miyen jeíhua huápi'i raamuá'itin í puaíjtzi. Ayee mú che'atá mana'a tíj huaríj a'íjna í Balaam teecan tí jeíhua huápi'i

auté'itze í Dios jemi. Ayee mú che'atá mena'a ehuaújpu'a'arixíl'in tij ajta á'upua'areca'a a'íjna í Coré tij a'ín ca'anín jín raatéxieehuataca'a a'íjna tij jín antiújmua'areereca'a a'íjna í Moisés teecan.

12 Setij sena'a e'etiújseire'en tej si naími'i tiú'ucua'ani se'íjna jime'e tej huaújxe'eve'en, a'íme mú a'ij pua'a ríj muá'aye'i. Ayee mu'u, camu a'ij mena'a tí'icua'a mú'ejmi jamuan, majta miyen tí'iseijre'e mú'ejmi jemi tij cíxuri tij tilicámeijri'lí. A'íí mú rujímu'a mena'a tiú'ujmi'icuaca, majta, camu tihuá'ami'icuaca í seica. Ayee mú 'een tij jaitiri mej caí jetze víjví'lyej sino eeca pu ráatisin. Ayee mú majta 'een tij ciyej tij caí taaca tij caí ché'e xíjcata'a pítí'irijca, tij pua'a ja'ati rá'ijcuta. Cu xíee hua'apua pu huatéehua nain jime'e.

13 Majta miyen 'een tij í jaj tij á'ujruuréjvee ca'anín jime'e, tij ajta jetzen aamíxcua'iri ájninei. Ajta a'íjna tij huá'a jetze airáninei a'ímej í teite, ayée pu hua'utatévi'iraste'en. Majta mú miyen 'een tij xu'ura'ave í mej mauj á'ujuhua'an a'u tij a'utíca'a. Ayee pu tihuá'aci'iti mej me'uun a'uteáтурan a'u tij jeíhua huápi'i a'utíca'a.

14 Ajta a'ín í Enóc, a'íjna tij aráhua'apua jetze tijite a'íme í mej Adán jetzen airáane, a'íí pu ayén tiu'utaxájtaca'a a'ímej jime'e tij ayén tiu'utaxájtaca'a í Dios jetze me'ecan tijín: "Casi'i, xaaseíj, tavástara'a pu yé ve'ecánejsin huá'a jamuan í mej ravaire'e í ta japua, a'íme tij ajta huateúra'ate. **15** A'íí pu huá'axi'epi'intari'iran naíjmi'ica, ajta a'íj pu jín huá'axi'je'en naíjmi'ica í mej rájcha'hire'eca'a í Dios a'íjna jime'e í mej a'ij

pua'a rijcaa ti caí ayén tiraavíjte'e í Dios jemi. A'íí pu ajta a'íjna jín huá'axijte'en a'íjna jime'e mej miyen jeíhua huápi'i a'ij pua'a tí'ixajtaca'a í Dios a'íime í mej auteájturaa í jemin mej mi caí miyen huárini a'ij ti tiraavíjte'e í jemin." Ayee pu tiu'utaxájtaca'a a'íjna í Enóc.

16 A'íime í teite, a'ii mú a'íin pú'een í mej ti'iti jín runiuúuste'e, í mej níniu'ucacu. Ayee mú til'itiújcha'íí a'ij ti tihuá'amitieje'e í huá'a tzajta'a. Ca'anín mú jín ti'ixáata muá'aye'i mej mi me'íjna jín á'ujtzaahuate'e. Majta miyen rí'i tihuá'ajee í teite mej mi ti'iti jín hua'utémua'itín.

Ca'aníjra'a pu hua'atá'aca a'ímej í mej té'atzaahuate'e

17 Mí seajta mú'een, mí nej já'amuaxe'eve'e, setá'aj ra'utámua'aree a'ij mej tiu'utaxájtaca'a í Dios jetze me'ecan a'íime í ti hua'antíhuau í tavástara'a, a'íjna í Jesús ti ajta Cirístu'u pú'een.

18 Ayee mú tiu'utaxájtaca'a ti ayén teja'uré'enejsin tijín: "A'ájna, tí'ij ari nain te'entipuá'arijme'en, a'íí mú huataseíjre'esin a'íime í mej tité'exieehuari'ira muá'aju'un, í mej miyen ti'itiújcha'íí muá'aju'un a'ij ti tihuá'amitieje'e í huá'a tzajta'a, tíj na'a ti caí ayén tiraavíjte'e í Dios jemi." **19** A'ii mú a'íin pú'een í mej ca'aníjra'a hua'atá'aca í teite mej mi já'ita'a a'utaci'ica'an. A'íí mú rujíimua'a mena'a a'ij tirájteu a'ij mej ríci. Camu a'atzu jetzen araújca'ane í xiéjniu'ucare'ara'an í Dios.

20 Mí seajta mú'een, mí nej já'amuaxe'eve'e, setá'aj ca'aníjra'a tiu'utá'an seíj seajta seíj, sej si te'utáviicua'i se'íjna jime'e sej ra'ará'astijre'en

se'íjna tì Dios ayén huateúra'ate. Setá'aj seajta araújca'anen se'íjna jetze í xiéniu'ucare'ara'an í Dios, sej si siyen huatéjniuni í Dios jemi. **21** Setá'aj seuj ra'utámua'aree tìj na'a tì yú auca'ití a'ame tì a'íin Dios ayén já'amuaxe'eve'e. Setá'aj seajta siyen rachú'eve'e se'íjna í tavástara'a, a'íjna í Jesús tì ajta Ciríistu'u pú'een tì ij a'íin a'íjna jín amuá'ancu'uvajxi'in a'íjna jime'e tì ayén tejámuatá'asin sej siyen jemin ruurican huateáтурan tìj na'a rusén jime'e.

22 Setá'aj seajta ca'aníjra'a hua'utá'an seica í mej caí rí'i té'atzaahuate'e. **23** Setá'aj seajta hua'irájtuaani seica, muári'eri jime'e. Ayee pu seíire'e a'ame. Cu xíee sej hua'irájtuaani í taij jetze. Seajta seica, í ti tì'itziíni'ire'e jime'e, setá'aj huá'ancu'uvajxi'in. Rí'i xu'u mú'een, a'iné jeíhua mú huápi'i xána'avisi'i seíire'e muá'aju'un a'íjna jime'e í mej jín auteájturaa í Dios jemi.

I niuucari tì jín ra'antipuá'ajte'esin

24-25 Ajta a'íin í Dios tì seij na'a pú'een, a'ii pu a'íin pú'een tì tu'irájtuaani. A'íi pu raayí'iti tì ca'aníjra'a amuaatá'an sej si caí tì'iti jín até'itze'ara'an í jemin. A'íi pu ajta amuaatéhuiite'esin í jemin a'u tì rí'i huápi'i naa tì'iseijre'e. Mú'een xu caí tì'iti a'aturáacan jín se'uun huaté'en, seajta huápi'i xu huataújtemua'ave'esin. Tiché'e tiyen rí'i tiraatá'an, a'iné a'íi pu a'íjna jín tì'itéjvee a'íjna jime'e tì jaítze'e ve'ée. A'íi pu ajta nain jín tì'ajita, ajta nain jín antiújmua'aree. A'íi pu ajta ayén téjmi japua huaniú a'íjna jime'e tì Ciríistu'u tu'irájtuaa tì'ij caí xi huataseíre'e í chaanaca tej japuan sei-jre'e. Tiché'e tiyen te'íjna jín rí'i tiraatá'an tìj na'a

tí yú auca'ití a'ame tíj na'a rusén jíme'e. Ché'e ayén
teja'uré'enen.

**I niuucari tì jejcua, tì ajta jime'en ra'axá
a'ijna i tavastara'a, i Ciriistu'u tì ji'i Jesús tì
tu'irájtuaa**

**New Testament in Cora, El Nayar Presidio De Los
Reyes; crn (MX:crn:Cora, El Nayar)**

copyright © 2008 Wycliffe Bible Translators, Inc.

Language: Cora, El Nayar

Translation by: Wycliffe Bible Translators, Inc.

Cora, Presidio de los Reyes [crn], Mexico

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cora, El Nayar

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022

10f6cd13-ea38-5c62-beee-25cf942ce3aa